

10 JUL 1998

Mahathir-Ekonomi

MALAYSIA PERLUKAN LANGKAH LUAR BIASA PULIHKAN EKONOMI

KUALA LUMPUR, 10 Julai (Bernama) -- Perdana Menteri Datuk Seri Dr Mahathir Mohamad berkata Malaysia memerlukan langkah luar biasa bagi mempercepatkan pemulihan kegawatan ekonomi yang dialami negara sekarang.

Kita sedang memikirkan langkah-langkah luar biasa itu, katanya ketika berucap sempena Majlis Makan Malam Tahunan Dewan Perniagaan Melayu Malaysia di sini malam ini.

Malaysia pernah melakukan perkara luar biasa seumpama itu dan ternyata mendatangkan hasil yang membanggakan, antaranya termasuklah Dasar Ekonomi Baru (DEB), projek kereta nasional dan Dasar Persyarikatan Malaysia, yang pada awalnya dikecam oleh banyak pihak, katanya.

Katanya, pelaksanaan DEB yang bertujuan menyusun semula masyarakat tidak pernah menimbulkan rusuhan kaum, sebaliknya beberapa negara asing berminat dan ingin mengetahui langkah-langkah yang dilaksanakan di negara ini kerana dapat mengekalkan perpaduan dan tidak berlaku sebarang rusuhan ketika kegawatan ekonomi, seperti di negara jiran.

Sehubungan itu, perpaduan dan disiplin masyarakat perlu diteruskan bagi membolehkan usaha pemulihan ekonomi dilaksanakan, katanya.

Beliau juga berharap golongan peniaga dan usahawan perlu memberikan sokongan kepada usaha-usaha kerajaan itu.

Katanya, negara yang aman akan lebih memudahkan kerajaan memberikan tumpuan menangani dan memulihkan kegawatan ekonomi, yang melanda negara ini.

"Perkara luar biasa jika diterima rakyat akan dapat dilaksanakan, sebaliknya langkah terbaik sekalipun jika tidak diterima rakyat tidak akan dapat dilaksanakan," katanya.

Katanya, setiap langkah baru yang luar biasa pasti ada pihak yang menentang, walau bagaimanapun ia adalah perkara biasa, dan jikalau kita yakin dengan usaha yang kita laksanakan, kita dapat capai dan atasi apapun masalah.

Turut hadir pada majlis makan malam itu ialah Ketua Setiausaha Negara Tan Sri Halim Ali dan Presiden Dewan Perniagaan Melayu Malaysia Tan Sri Tajuddin Ramli.

--BERNAMA

RZS RI